

A *rubá*

A *ntaño*



Deterioro y derumbe di cada edificio riba nos isla cu tin su historia y ta representa algo di nos cultura y existencia ta parce nos cu no tin e atencion ni e vision pa cu esaki, y mas tanto pa parti di nos gobernantenan di awor y hasta di pasado.

Recientemente nos por a observa con tur e edificionan bieu cu ta parti di e historia di Corsow a haya un proteccion y un reparacion pa parti di gobierno. Siendo cu aki nos ta moviendo cu demasiado rapidez den e caminda di modernizacion sin ta nota cu nos ta cabando di loke Aruba ta di berdad pa traha caminda pa loke no ta di nos. Cu otro palabra nos ta birando arucanos y arucambas ora cu nos mira esaki nan. Nos sa cu e intencion ta pa un atraccion turistico, pero cual tin mas balor historico di loke ta di nos? Esaki (foto) ta e cas di difunto Lala, cual ta keda banda di un monumento (siendo cu e tambe por a ser mantene como uno) cual ta e cas di Ecury, construi na aña 1929. E cas di Ecury ta unda cada bista riba dje ta trece na nos memoria nos heroe Boy Ecury. E cas di Lala cual tabatin e ofishi di sneiru, tambe por ser considera pa su construccion di tanto aña pasa como un di nos monumentonan. Cuanto di nos despues di school no a sinta na un winkel of otro, sea den e cas aki como den cualkier otro cu tin su shap. Awe esaki a ser converti den otro cueba di e ladronnan y e drogadictonan. Tur clase di porqueria tin den e cas bandona aki, y pa colmo de los colmos e ta keda net patras di un restaurant cu ta ricibi turistanan cu ta sali pa nan dinner. Unda e vision pa loke ta monumenten-zorg a keda? Kico ta nifica 'monumenten-zorg'. Monumenten-zorg ta nifica zorg van regeringswege voor het goede staat houden van monumenten. Cada edificio cu ta representa nos pasado y historia ta un monumento. Un monumento ta un recordatorio di pasado, ya cu esaki ta recorda nos di tempo pasá, cu otro palabra di nos Aruba Antaño. Si nos mester bay den historia, anto e pregunta ta keda pakico a mantene tur e monumentonan for di tempo di Cristo; tur esnan cu a ser restaura despues di e segunda guerra mundial; y di con nos gobiernonan casi nunca tabatin e verdadero vision y conocimiento di e verdadero valor di esakinan. Ultimamente nos ta tende di tal comision o organizacion cu a lanta aki na Aruba, pero cuanto tempo mas nos tin di warda pa realmente mira algo ser haci. Pakico na Corsow e gobierno a cumpra tur e edificionan aki, restaura y drecha, y hopi ta di opinion cu e monumentonan aki di nos tin mas valor cultural y historico cu tur e modernizacion di ultimo tempo. Pensa nomas riba loke na final a ser yama El Castillo - E Cas di Dr. Eloy Arends cu a ser converti despues di un restaurant chino pa un cueba di vagabundos y drogadictos, pero cu si a ser tuma como un issue politico pa haci politiqueria. Cual ta e diferencia di e cas di Machi Arends cu loke e ta awe como un restaurant. Y asina nos por sigui muestra riba e poco vision cu tabatin pa loke ta nos monumentonan. Nos ta trece nos tiki conocimiento riba loke ta nos Aruba Antaño, pero lamentablemente nos no por ilustra nan graficamente ya mannan pecador a basha esakinan abao pa haya lugar pa traha loke no ta representa nos pasado ni nos historia.